

**Nogometni/Fudbalski savez Bosne i Hercegovine**



**PRAVILNIK O RADU  
KOMITETA IZVRŠNOG ODBORA I PRAVNIH  
TIJELA NS/FS BIH**

**Sarajevo, juli/srpanj 2019. godine**

# **SADRŽAJ**

## **I OPŠTE ODREDBE**

## **II INTERNA ORGANIZACIJA**

## **III KOMITETI NS/FS BIH**

**A – Zajedničke odredbe za sve stalne komitete**

**B – Stalni komiteti**

**C – Ad-hoc komiteti**

## **IV PRAVNA TIJELA**

**A – Vrste pravnih tijela**

**B – Zajedničke odredbe za sva pravna tijela**

**C – Uslovi za status člana**

## **V ZAVRŠNE ODREDBE**

Na osnovu člana 35. Statuta Nogometnog/Fudbalskog saveza Bosne i Hercegovine BiH, Izvršni odbor NS/FS BiH na sjednici održanoj 17.07.2019. godine, donosi s l i j e d e ć i

# **PRAVILNIK O RADU KOMITETA IZVRŠNOG ODBORA I PRAVNIH TIJELA**

Nogometnog /Fudbalskog saveza Bosne i Hercegovine

## **I OPŠTE ODREDBE**

### **Član 1.**

(Skraćenice i značenje pojmova)

Za potrebe ovog pravilnika, koriste se sljedeće skraćenice:

- a) NS/FS BiH: Nogometni/Fudbalski savez Bosne i Hercegovine
- b) IO NS/FS BiH: Izvršni odbor Nogometnog/Fudbalskog saveza Bosne i Hercegovine
- c) GSK NS/FS BiH: Generalna skupština Nogometnog/Fudbalskog saveza Bosne i Hercegovine
- d) GS NS/FS BiH: Generalni sekretarijat Nogometnog/Fudbalskog saveza Bosne i Hercegovine
- e) NS FBiH: Nogometni savez Federacije Bosne i Hercegovine
- f) FS RS: Fudbalski Savez Republike Srpske

Za potrebe ovog pravilnika, korištenje oblika za muški rod jednako se odnosi i na ženski rod.

## **II INTERNA ORGANIZACIJA**

### **Član 2.**

(Područje primjene)

Ovim pravilnikom regulišu se sljedeće oblasti:

- a) sastav i nadležnosti-zadaci komiteta NS/FS BiH;
- b) sastav i nadležnosti-zadaci pravnih tijela NS/FS BiH.

### **III KOMITETI NS/FS BiH**

U skladu sa odredbama članova 43. 44. i 45. Statuta Nogometnog/Fudbalskog saveza Bosne i Hercegovine ovaj Pravilnik određuje prava donošenja odluka, status članova, te prava i obaveze stalnih i ad hoc komiteta Nogometnog/Fudbalskog saveza BiH.

#### **A – Zajedničke odredbe za sve stalne komitete**

##### **Član 3.**

(Sastav komiteta)

Komiteta se sastoji od 3 (tri) ili 6 (šest) članova, o čemu odluku donosi Izvršni odbor NS/FS BiH.

Svaki komitet ima predsjedavajućeg i 2 (dva) potpredsjedavajuća. IO NS/FS BiH osigurava da dvije trećine članova komiteta budu predstavnici NS FBiH, a jedna trećina predstavnici FS RS.

Predsjedavajućeg i 2 (dva) potpredsjedavajuća, kao i članove komiteta imenuje IO NS/FS BiH na mandat od 4 (četiri) godine, sa mogućnošću ponovnog imenovanja. Predsjedavajući i 2 (dva) potpredsjedavajuća se rotiraju na funkcijama svakih 16 (šesnaest) mjeseci od dana imenovanja.

IO NS/FS BiH, također na mandat od 4 (četiri) godine, imenuje i po 3 (tri) zamjenska člana svakog komiteta, koji mogu preuzeti funkciju člana komiteta u skladu sa članom 5. ovog Pravilnika.

IO NS/FS BiH osigurava da 2/3 (dvijetrećine) stalnih komiteta budu pod predsjedavanjem predstavnika NS FBiH, a 1/3 (jednatrećina) pod predsjedavanjem predstavnika FS RS.

Predsjedavajući, ili jedan od 2 (dva) potpredsjedavajuća, mora predstavljati FS RS.

##### **Član 4 .**

(Imenovanje članova komiteta)

Članove komiteta NS/FS BiH imenuje IO NS/FS BiH.

Izvršni odbor NS/FS BiH određuje odgovarajući rok za podnošenje prijedloga za imenovanje komiteta.

Uz prijedlog sa imenima kandidata za članove komiteta, a u skladu sa članom 19. Statuta NS/FS BiH, entitetski savezi su obavezni uz prethodno propisanu dokumentaciju dostaviti i dokaz o stupnju/stepenu i vrsti školske spreme kandidata za traženu poziciju.

##### **Član 5.**

(Razrješenje članstva u komitetu)

Član komiteta može biti razriješen funkcije (članstva) te po potrebi zamijenjen putem IO NS/FS BiH za preostali period mandata (članstva) u slučaju:

- a) smrti;
- b) ostavke;
- c) nesposobnosti obavljanja dužnosti zbog teške bolesti ili nesreće;
- d) razrješenja prema odredbama Statuta NS/FS BiH;
- e) ukoliko prema ocjeni IO NS/FS BiH svoju funkciju obavlja na nezadovoljavajući način;
- f) kada član ne prisustvuje na najmanje dvije propisno sazvane sjednice komiteta bez opravdanog razloga tokom iste kalendarske godine, a o čemu će predsjedavajući komiteta odmah obavijestiti IO NS/FS BiH.

U slučajevima iz prethodnog stava člana komiteta zamjenjuje zamjenski član do završetka mandata.

Zamjenskog člana nedostajućem članu komiteta određuje Izvršni odbor, iz reda imenovanih zamjenskih članova datog komiteta, vodeći računa o potrebnim kriterijima zastupljenosti u skladu sa članom 3. ovog Pravilnika.

### **Član 6.**

(Kvorum i odluke)

Ukoliko se radi o komitetima sa 3 (tri) člana, na prvoj sjednici komiteta potrebno je prisustvo sva 3 (tri) člana, a odluka je usvojena ako je podrže najmanje 2 (dva) člana Komiteta.

U slučaju nedostatka kvoruma prisustva na prvoj sjednici Komiteta zakazuje se ponovljena sjednica narednog radnog dana u isto vrijeme i na istom mjestu. Na ovoj sjednici potrebno je prisustvo najmanje dva člana Komiteta, a odluka je usvojena ako je podrže najmanje dva člana Komiteta.

Ako se radi o komitetima sa 6 (šest) članova, kvorum prisustva je najmanje 5 (pet) članova. Odluke se donose na prvom sastanku ako ih podrži najmanje 4 (četiri) člana komiteta.

U slučaju nedostatka kvoruma prisustva na prvoj sjednici komiteta, zakazuje se ponovljena sjednica narednog radnog dana u isto vrijeme i na istom mjestu. Na ovoj sjednici potrebno je prisustvo najmanje 4 (četiri) člana komiteta. Na drugom sastanku odluke se donose ako ih podrži 3 (tri) prisutna člana.

Na ponovljenoj sjednici uz prisustvo svih 6 (šest) članova komiteta, odluke se donose u skladu sa stavom 3. ovog člana. Glasanje se obavlja dizanjem ruku.

U hitnim slučajevima, Komitet može donositi odluke i pisanim očitovanjem članova Komiteta (putem e-maila ili faxesa), o čemu odlučuje Predsjednik Komiteta.

Kada se glasa putem e-maila ili faxesa, predsjednik Komiteta organizuje glasanje, dostavlja materijale i rezultate izvršenog glasanja NS/FS BiH, uključujući isprintane e-mailove ili faxesove.

Kod glasanja pismenim očitovanjem, odluka se smatra usvojenom samo ako je donesena konsenzusom.

### **Član 7.**

(Načela u radu komiteta)

Komiteti u svom radu poštuju načela neovisnosti i princip povjerljivosti.

- a) Načelo neovisnosti podrazumjeva da komitet radi potpuno neovisno, bez ikakvih uputa i sugestija drugih tijela, organa ili pojedinaca. Članovi komiteta se obavezuju da će se suzdržati od vršenja bilo kakvih aktivnosti koje bi na bilo koji način bile nepoštene prirode i/ili u suprotnosti sa interesima NS/FS BiH. Članovi komiteta će se suzdržati od učestvovanja u diskusijama i/ili donošenju odluka po bilo kojem pitanju ili u bilo kojoj situaciji gdje postoji sukob interesa bilo to interesa samog člana ili člana njegove porodice, rodbine ili prijatelja. Članovi komiteta moraju odmah o bilo kojem obliku sukoba interesa obavijestiti predsjedavajućeg, koji donosi odluku u slučaju dvojne ili spora u pogledu neovisnosti člana. Ukoliko postoji dvojba ili spor u pogledu neovisnosti predsjedavajućeg komiteta, Generalni sekretar donosi konačnu odluku.
- b) Načelo povjerljivosti podrazumjeva da se svi članovi komiteta obavezuju da sve informacije sa kojim su upoznati vezano za određena pitanja i postupke, ostanu povjerljive. Članovi komiteta NS/FS BiH ne smiju otkrivati zaprimljene

informacije dobivene tokom rada u NS/FS BiH (osim NS/FS BiH) te su ih obavezni držati u potpunoj tajnosti prije, tokom i nakon svog imenovanja na funkciju. Povjerljiva dokumentacija se mora pažljivo čuvati te ista vratiti sekretaru komiteta nakon završetka mandata člana. Komiteti upoznaju sredstva javnog informisanja o svojim odlukama, zaključcima i stavovima jedino putem Press službe (portparola) NS/FS BiH.

### **Član 8.**

(Predsjedavajući)

Predsjedavajući predstavlja komitet. Nakon konsultacija sa Generalnim sekretarom ili kompetentnom osobom iz Generalnog sekretarijata koju Generalni sekretar ovlasti, predsjedavajući određuje datume i dnevni red sjednica.

Predsjedavajući je odgovoran da komitet propisno obavlja svoje poslove i da o tome redovno informiše IO NS/FS BiH.

Predsjedavajući komiteta NS/FS BiH u saradnji sa sekretarom / administracijom:

- a) priprema sastanke komiteta (dnevni red, pozive, itd.)
- b) predsjedava sastankom komisije;
- c) predvodi diskusije i osigurava nesmetan tok sastanka;
- d) odobrava zapisnik-listu aktivnosti;
- e) odmah obavještava članove komiteta o svim posebnim situacijama;

Predsjedavajući koordinira zahtjevima za izlaganje. On može ograničiti vrijeme govornicima ili preuzeti druge mjere kako bi osigurao harmoničan tok sastanka.

Ako je predsjedavajući odsutan ili predsjedavajući ne može obavljati svoju dužnost na sastanku ili dijelu sastanka zbog sukoba interesa, njega će zamijeniti prvi potpredsjednik, a u slučaju odsustva prvog potpredsjednika njega će zamijeniti drugi potpredsjednik.

### **Član 9.**

(Sekretar komiteta/komisije-povjerenstava)

Generalni sekretarijat pruža administrativnu podršku stalnim i ad hoc komitetima. U tu svrhu Generalni sekretar donosi odluku i imenuje kompetentnu osobu za Sekretara komiteta/komisije-povjerenstva. Sekretar se bira iz reda zaposlenika, Generalnog sekretarijata NS/FS BiH.

Zadaci Sekretara komiteta/komisije-povjerenstva su:

- a) zajedno sa predsjedavajućim priprema i organizuje sjednice komiteta;
- b) u ime predsjedavajućeg šalje pozive za sjednice sa dnevnim redom i pratećom dokumentacijom;
- c) vodi zapisnike sa sjednica komiteta;
- d) ažurira evidenciju članova;
- e) zajedno sa predsjedavajućim priprema godišnje izvještaje i planove rada na godišnjem nivou;
- f) aktivno učestvuje na izradi odluka, zaključaka i uputstava komiteta;
- g) prati realizaciju i provođenje odluka i zaključaka komiteta;
- h) radi sa svim članovima na izradi izmjena i dopuna propisa iz domena rada komiteta;

- i) prati usklađenost propisa NS/FS BiH iz domena rada komiteta sa zakonskim propisima u BiH;
- j) u ime komiteta korespondira sa Generalnim sekretarijatom NS/FS BiH i ostalim statutarnim tijelima NS/FS BiH.

### **Član 10.**

(Saradnja, podrška i radne grupe)

Svaki komitet NS/FS BiH saraduje po potrebi sa drugim komitetima, pravnim tijelima, Generalnim sekretarijatom i drugim organima NS/FS BiH.

Svaki komitet NS/FS BiH može u radu tražiti podršku ili usluge od spoljnih stručnih savjetnika.

Svaki komitet NS/FS BiH može po potrebi uspostaviti ad hoc radnu grupu za rješavanje određenih oblasti. Radnu grupu mogu da čine ograničeni broj članova odnosnog komiteta, spoljni stručni savjetnik/ci, kao i zaposlenici nadležnog odjela Generalnog sekretarijata NS/FS BiH. Radne grupe podnose izvještaj odnosnom komitetu.

### **Član 11.**

(Prisustvo i učestalost sastanaka)

Članovi komiteta NS/FS BiH moraju lično prisustvovati sastancima. Zamjenici i/ili pratnja ne mogu pristupiti sastancima.

Članovi Izvršnog odbora zaduženi za pojedine oblasti, Predsjednik i Generalni sekretar NS/FS BiH mogu prisustvovati sastancima komiteta NS/FS BiH. Sastancima komiteta NS/FS BiH uvijek prisustvuju sekretar komiteta, a zavisno od potreba mogu biti pozvani i drugi članovi Generalnog sekretarijata NS/FS BiH.

Sastanci komiteta NS/FS BiH nisu otvoreni za javnost. Međutim, komitet može pozvati treće strane da uzmu učešće na sastanku, ako smatra da je to potrebno shodno dnevnom redu i hitnosti postupka.

Učestalost sastanaka komiteta NS/FS BiH određuje predsjedavajući, u saradnji sa Generalnim sekretarijatom, shodno potrebama i hitnosti situacije i predmeta koje treba razmotriti.

### **Član 12.**

(Dnevni red sastanka komiteta)

Predsjedavajući komiteta, u saradnji sa sekretarom komiteta, priprema nacrt dnevnog reda za sastanak odnosnog komiteta.

Sljedeće stavke je potrebno uvrstiti na dnevni red sastanka:

- a) uvod predsjedavajućeg;
- b) prozivka članova;
- c) izvještaj o provedenim procedurama shodno zapisniku-listi aktivnosti sa prethodnog sastanka;
- d) teme sastanka;
- e) ostalo.

Prijedlog dnevnog reda treba poslati članovima odnosnih komiteta NS/FS BiH zajedno sa pozivnim pismom i relevantnim dokumentima 7 (sedam) dana prije sastanka, a ukoliko obim i priroda poslova zahtjevaju, ovaj rok može biti i kraći od 7 (sedam) dana. Članovi komiteta mogu predložiti predsjedavajućem izmjenu ili dopunu dnevnog reda sastanka. U pravilu, takvi prijedlozi moraju biti upućeni sekretaru komiteta 3 (tri) dana

prije održavanja sjednice. Isti se moraju dostaviti u pismenoj formi, te je potrebno navesti argumentovane razloge za izmjenu i dopunu dnevnog reda. U skladu sa prethodnim potrebno je dostaviti dopunu materijala za novi dnevni red sjednice.

U posebnim slučajevima, kada to situacija nalaže, mogu biti i kraći rokovi za dostavljanje pozivnog pisma i relevantne dokumentacije, kao i za dostavljanje prijedloga za tačke dnevnog reda od strane članova komiteta.

Dnevni red se utvrđuje prije početka sastanka. Predsjedavajući može prilagoditi dnevni red ako ocijeni da je određeno pitanje hitno.

Izmjene dnevnog reda se ne mogu vršiti tokom sastanka.

### **Član 13.**

(Odgovornosti)

Za svaki od stalnih komiteta određene su posebne nadležnosti i odgovornosti, koje su definisane odredbama ovog Pravilnika.

### **Član 14.**

(Zapisnik - Lista aktivnosti)

Nakon svakog sastanka komiteta NS/FS BiH, sekretar komiteta priprema zapisnik - listu aktivnosti.

Zapisnik - lista aktivnosti se odnosi na aktivnosti koje je potrebno preduzeti, a treba da sadrži sljedeće:

- a) datum, mjesto i vrijeme sastanka;
- b) listu učesnika i odsutnih članova
- c) konačni dnevni red;
- d) komentare učesnika koji su izričito namijenjeni da se uvrste u listu aktivnosti;
- e) opis donesenih odluka, zaključaka ili dogovorenih mjera;
- f) jasan opis aktivnosti/zadataka koje je potrebno preduzeti/izvršiti, imena osoba zaduženih za realizaciju datih aktivnosti/zadataka i tačan rok za postizanje navedenih aktivnosti/zadataka;
- g) datum i mjesto sačinjavanja liste aktivnosti navodeći i ime sekretara komiteta.

Zapisnik - listu aktivnosti treba odobriti predsjedavajući komiteta, u roku od tri (3) dana, od dana održavanja sastanka, nakon čega se zapisnik-lista aktivnosti prosljeđuje (poštom, faksom ili e-mailom):

- a) članovima odnosnog komiteta NS/FS BiH (prisutnim ili odsutnim),
- b) Generalom sekretaru NS/FS BiH,
- c) osobama zaduženim za realizaciju aktivnosti/ zadataka,
- d) ostalim učesnicima koje odredi predsjedavajući komiteta (npr. članovima IO NS/FS BiH).

### **Član 15.**

(Etičko i profesionalno ponašanje i ostale obaveze)

Prije stupanja na dužnost, članovi komisija i stručnih vijeća NS/FS BiH su dužni:



- da pismeno obavijeste Generalnog sekretara NS/FS BiH o svim funkcijama koje su obavljali ili koje trenutno obavljaju, posebno one vezane za nogomet/fudbal, a koje bi mogle doći u sukob sa funkcijom unutar NS/FS BiH, te o svim drugim profesionalnim angažmanima, drugim zvanjima ili poslovnim relacijama i/ili vezama sa osobama ili kompanijama;
- da odmah pismeno obavijeste Generalnog sekretara NS/FS BiH o svakoj promjeni u pogledu gore navedenog tokom trajanja svog mandata (članstva).

Tokom svog mandata (članstva), članovi komiteta NS/FS BiH su dužni:

- da poštuju principe vjernosti, integriteta i sportskog duha u skladu sa principima korektnosti, što posebno uključuje obavezu suzdržavanja od svih aktivnosti koje bi mogle ugroziti integritet NS/FS BiH ili njegovih takmičenja ili nogometu/fudbalu donijeti loš ugled;
- da se suzdrže od prihvatanja bilo kakvih novčanih darova te prihvatanja bilo kakvog oblika koristi za koju bi se realno moglo smatrati da prevazilazi lokalne kulturne običaje (ova se odredba odnosi na besplatne pozive trećih strana koje imaju interes da utiču na buduće odluke ili izbore unutar NS/FS BiH; ako u vezi sa ovim postoji dilema, članovi su dužni konsultovati Generalnog sekretara NS/FS BiH);
- da poštuju i sva ostala etička pravila ponašanja navedena u Etičkom kodeksu FIFA-e, te ostalim pravnim aktima NS/FS BiH.

Od članova komiteta NS/FS BiH se očekuje:

- da izvršavaju sve zadatke uz najviše profesionalne vještine i pažnju u skladu sa statutima, pravilnicima, direktivama i odlukama NS/FS BiH, FIFA i UEFA;
- da preduzimaju razumne korake na sticanju i održavanju svih neophodnih vještina za obavljanje svakog NS/FS BiH i/ili FIFA/UEFA zadatka što uključuje i sticanje znanja o relevantnim pravilnicima, direktivama, instrukcijama i uputstvima koje periodično izdaju NS/FS BiH, FIFA i UEFA;
- da na početku svog mandata (članstva) potpišu izjavu kojom su saglasni da će poštovati statute, pravilnike, direktive i odluke NS/FS BiH i UEFA-e, te da priznaju nadležnost Arbitražnog suda za sport u Lozani (CAS) kao što je utvrđeno u Statutu UEFA-e;
- da dostave lične podatke sekretaru komiteta i da ga obavijeste o eventualnim promjenama putem telefona, e-maila, faksa ili pisma;
- da obavijeste sekretara komiteta o svakoj svojoj vezi sa članicama, ligom ili klubovima koji učestvuju u takmičenjima NS/FS BiH i UEFA-e, te da ga shodno tome, na vrijeme obavijeste o svakoj promjeni datih informacija;
- da se pripreme za sastanak;
- da aktivno učestvuju u diskusijama;
- da obavljaju dodijeljene zadatke u utvrđenim rokovima;
- da daju puni doprinos postizanju utvrđenih ciljeva.

## **Član 16.**

(Dnevnice, troškovi i druga prava)

Članovi komiteta imaju pravo na:

- takse koje je utvrdio NS/FS BiH,
- dnevnice utvrđene zakonom,
- naknadu putnih i drugih realnih troškova (npr. hotelskog smještaja).

## B – Stalni komiteti

### Član 17.

Stalni komiteti NS/FS BiH su:

- 1) Finansijski komitet;
- 2) Komitet za takmičenje;
- 3) Tehnički komitet;
- 4) Komitet za sportsku medicinu;
- 5) Komitet za sudije i suđenje;
- 6) Komitet za omladinski nogomet/fudbal (ad hoc Komitet, do održavanja Generalne skupštine NS/FS BiH);
- 7) Komitet za ženski nogomet / fudbal (ad hoc Komitet, do održavanja Generalne skupštine NS/FS BiH);
- 8) Komitet za futsal i nogomet/fudbal na pijesku;
- 9) Komitet za status igrača i transfere;
- 10) Pravni komitet;
- 11) Komitet za stadione i sigurnost;
- 12) Komitet za medije;
- 13) Komitet za marketing i TV;

Komitet za ženski nogomet / fudbal i Komitet za omladinski nogomet / fudbal djeluju kao ad hoc komiteti do izmjene člana 43. Statuta NS/FS BiH.

### Član 18.

#### 1. FINANSIJSKI KOMITET

##### **a) Uslovi za status člana**

Članovi i zamjenski članovi moraju imati visoku školsku spremu, završen ekonomski fakultet (četverogodišnji studij ili minimalno 240 ECTS bodova), uz stručno iskustvo od 3 (tri) godine nakon sticanja tražene stručne spreme.

##### **b) Nadležnosti i zadaci**

Finansijski komitet, u saradnji sa Odjelom za finansije, ima sljedeće nadležnosti i zadatke:

- učestvuje u izradi Budžeta (davanjem prijedloga i sugestija) i usaglašen prijedlog predlaže Generalnom sekretaru i IO NS/FS BiH na razmatranje i usvajanje;
- savjetodavno djeluje u cilju kvalitetnog upravljanja sredstvima i finansijskim rizikom;
- učestvuje u izradi koncepta planiranja i investiranja;
- daje primjedbe i prijedloge IO NS/FS BiH vezano za odgovarajuće ugovore finansijskog karaktera;
- razmatra mišljenje nezavisnog revizora i predlaže mjere, ukoliko su potrebne i analizira njihovu realizaciju;

- djeluje na uspostavljanju sistema internih kontrola i njegovoj dosljednoj primjeni;
- po potrebi saraduje sa nezavisnim revizorom, drugim komitetima i pravnim tijelima Saveza;
- ovaj Komitet je nadležan i za druga pitanja prema odlukama Izvršnog odbora Saveza.

## **Član 19.**

### **2. KOMITET ZA TAKMIČENJE**

#### ***a) Uslovi za status člana***

Članovi i zamjenski članovi moraju imati (VSS) visoku školsku spremu ili niži stepen stručne spreme uz uslov da je u prethodnom periodu obavljao dužnost člana Komiteta za takmičenje u trajanju od najmanje 4 (četiri) godine na entitetskim ili državnom nivou, ili da su obavljali dužnost delegata na Premijer ligi BiH ili Prvim ligama NS FBiH i FSRS u trajanju od najmanje 4 (četiri) godine.

#### ***b) Nadležnosti i zadaci***

Komitet za takmičenje vrši praćenje svih takmičenja koja su u nadležnosti NS/FS BiH, savjetuje IO NS/FS BiH i Generalnog sekretara o svim vrstama pitanja vezanim za takmičenja i upravljanje organizacijom takmičenja, ne samo ona od državne važnosti nego i za pojedinačne klubove, a koja se trebaju stalno pratiti i analizirati.

U ovom pogledu, Komitet za takmičenje treba imati vrlo dobru, stalnu, institucionalizovanu i blisku saradnju sa svim drugim komitetima, kako bi imao potpuniji uvid u sva takmičenja i sve s njima povezane uslove koja su u nadležnosti NS/FS BiH.

Komitet za takmičenje mora posjedovati sve relevantne informacije o takmičenjima u svakom trenutku i mora ih biti spreman dostavljati Generalnom sekretaru NS/FS BiH na dnevnoj osnovi, kao i IO NS/FS BiH radi odlučivanja i preduzimanja mjera prema potrebi.

IO NS/FS BiH daje smjernice Komitetu za takmičenje u smislu ciljeva i prioriteta takmičarskih politika, kao i pravila koja Komitet za takmičenje treba ispravno slijediti.

Komitet za takmičenje nezavisno i permanentno izvršava sljedeće zadatke:

- izvještava o takmičenjima u nadležnosti NS/FS BiH, Izvršni odbor NS/FS BiH i Generalnog sekretara;
- utvrđuje i daje prijedlog IO NS/FS BiH u vezi sa mogućim promjenama sistema takmičenja u BiH;
- odgovorno upravlja procesima organizacionog rizika takmičenja;
- predlaže politiku ulaganja u infrastrukturu potrebnu za redovna takmičenja;
- predlaže mjere za spriječavanje potencijalnih problema u «utakmicama visokog rizika» zajedno s Komitetom za stadione i sigurnost NS/FS BiH;
- ocjenjuje regularnost takmičenja i podnosi izvještaje IO NS/FS BiH;
- provodi seminare i predlaže listu delegata IO NS/FS BiH za utakmice Premijer lige BiH, Premijer omladinske lige, Premijer futsal lige i Premijer ženske lige;
- upravlja procesima, stalno nadzire i kontroliše sva takmičenja u nadležnosti NS/FS BiH;
- predlaže IO NS/FS BiH kalendar stalnih takmičenja iz svoje nadležnosti;

- izrađuje preporuke o eventualnim izmjenama i dopunama postojećih klupskih takmičenja NS/FS BiH, kao i izmjenama i dopunama svih pravilnika kojima su regulisana ova takmičenja;
- Predsjednik i dva potpredsjednika Komiteta vrše delegiranje delegata na utakmicama BHT Premijer lige, a ostali članovi na utakmicama ostalih takmičenja u nadležnosti NS/FS BiH, u skladu sa internom raspodjelom;
- prati pripremu i izvođenje svih faza takmičenja;
- prati i ocjenjuje rad delegata i predlaže listu istih prema IO NS/FS BiH, u skladu sa Pravilnikom o kriterijima, ocjenjivanju i rangiranju rada delegata;
- vrši registraciju utakmica Premier lige BiH i završnice Kupa BiH, kao i ostala takmičenjima u nadležnosti NS/FS BiH;
- rješava zahtjeve, žalbe, pritužbe i prigovore u vezi s takmičenjem i listama delegata, kao i druge akte upućene Savezu, ukoliko se odnose na takmičenje, a po važećim propozicijama i pravilima igre koje je donio IFAB, a usvojili FIFA, UEFA i NS/FS BiH; prati pripremu i provođenje izvlačenja takmičarskih parova i njihove uslove;
- predlaže format i pravila kvalifikacija za Kup BiH;
- ovaj komitet je nadležan i za druga pitanja prema odlukama Izvršnog odbora NS/FS BiH.

## **Član 20.**

### **3. TEHNIČKI KOMITET**

#### ***a) Uslovi za status člana***

Članovi i zamjenski članovi moraju imati visoku školsku spremu, (četverogodišnji studij ili minimalno 240 ECTS bodova), uz stručno iskustvo od 3 (tri) godine nakon sticanja tražene stručne spreme i iskustvo od 5 (pet) godina kao istaknuti nogometni/fudbalski stručnjaci.

#### ***b) Dužnosti i zadaci***

U saradnji sa Tehničkim sektorom, Tehnički komitet je nadležan za sljedeće:

- učestvovanje u izradi prijedloga plana i programa za unapređenje rada svih reprezentativnih selekcija;
- utvrđivanje kriterija za izbor i imenovanja u stručnim štabovima reprezentativnih selekcija;
- unapređivanje kvaliteta nogometa/fudbala, putem savremenih metoda treninga;
- poduzimanje svih neophodnih mjera za poboljšanje radno-pravnog statusa trenera;
- rješavanje pitanja nogometne/fudbalske teorije i prakse;
- učestvovanje u provođenju seminara za trenere, u saradnji sa Centrom za edukaciju NS/FS BiH;
- ovaj komitet rješava i druga pitanja u saradnji sa Tehničkim sektorom, a u skladu sa odlukama i zahtjevima IO NS/FS BiH.

## Član 21.

### 4. KOMITET ZA SPORTSKU MEDICINU

#### *a) Uslovi za status člana*

Članovi i zamjenski članovi moraju imati visoku školsku spremu, završen medicinski fakultet – specijalizacija iz oblasti sportske medicine, hirurgije ili ortopedije, uz stručno iskustvo od 3 (tri) godine nakon sticanja tražene stručne spreme.

#### *b) Dužnosti i zadaci*

Komitet za sportsku medicinu:

- prati odredbe svih zakona, podzakonskih akata i drugih domaćih propisa i svih međunarodnih propisa relevantnih za N/FS BiH uključujući zakone i pravilnike UEFA i FIFA-e kao i domaće pravne propise i standarde u pogledu zdravstvene zaštite nogometaša/fudbalera;
- osigurava unapređenje zdravstvene zaštite nogometaša/fudbalera svih uzrasta;
- saraduje sa entitetskim i područnim/kantonalnim savezima i klubovima radi razvoja zdravstvene službe u klubovima i redovnih ljekarskih pregleda igrača;
- organizuje u saradnji sa zdravstvenim institucijama i stručnjacima sportske medicine edukaciju iz područja medicine za klupske doktore, fizioterapeute i trenere;
- predlaže kriterije za izbor doktora i fizioterapeuta svih reprezentativnih selekcija;
- ostvaruje saradnju sa Agencijom za antidoping kontrolu BiH i preduzima odgovarajuće mjere i aktivnosti protiv dopinga, uključujući i Pravilnik o antidoping kontroli;
- na kraju svake takmičarske sezone podnosi izvještaj IO NS/FS BiH o stanju zdravstvene zaštite u klubovima u okviru NS/FS BiH i drugim aktivnostima;
- obavlja inspekcijски nadzor, te dostavlja mišljenje Komitetu za takmičenje, u pogledu ispunjenosti medicinskih zahtjeva na stadionima na kojima se odigravaju utakmice takmičenja NS/FS BiH;
- ovaj komitet je nadležan i za sva ostala pitanja u skladu sa odlukama i zahtjevima IO NS/FS BiH.

## Član 22.

### 5. KOMITET ZA SUDIJE I SUĐENJE

#### *a) Uslovi za status člana*

Članovi i zamjenski članovi moraju imati (VSS) visoku školsku spremu ili niži stepen stručne spreme uz uslov da je u prethodnom periodu obavljao dužnost člana Komiteta za sudije i suđenje u trajanju od najmanje 4 (četiri) godine na entitetskim ili državnom nivou, ili da je najmanje 4 (četiri) godine obavljao dužnost kontrolora suđenja na entitetskim ili državnom nivou, uz iskustvo od 5 (pet) godina u nogometu/fudbalu kao sudija/sudac - instruktor.

#### *b) Nadležnosti i zadaci*

Komitet za sudije i suđenje:

- Predsjednik i dva potpredsjednika Komiteta, u saradnji sa Odjelom za sudije GS NS/FS BiH vrše delegiranje službenih lica za utakmice BHT Premijer lige, a ostala 3 (tri) člana vrše delegiranje službenih lica za utakmice ostalih takmičenja u nadležnosti NS/FS BiH, u skladu sa internom raspodjelom zadataka;
- prati osiguravanje uslova za dobar rad sudija, pitanja vezana za korištenje adekvatnih sudijskih tehnologija i postupaka za održavanje i zaštitu fer-plej ponašanja igrača na nogometnim/fudbalskim utakmicama, te prati djelotvornost i efikasnost različitih pristupa i rezultata od strane referentnih sudija;
- svi članovi Komiteta ravnopravno učestvuju u analizi izvještaja sa svih utakmica iz nadležnosti NS/FS BiH;
- savjetuje IO NS/FS BiH o svim pitanjima i operativnom upravljanju u vezi sa smjernicama i postupcima za dobro suđenje bitnim za nogometnu/fudbalsku igru, utakmice i igrače;
- posmatra, prati, nadzire i analizira izvještaje posmatrača suđenja, uzimajući u obzir sve aspekte i okolnosti nogometnog/fudbalskog takmičenja i utakmica kao i svih događaja koji zahtijevaju ocjenu rada sudija i uslova za njihov nastup i vođenje utakmica, te predlaže ili nezavisno preduzima odgovarajuće i relevantne mjere;
- izrađuje izvještaje o radu Komiteta, te ih podnosi IO NS/FS BiH u skladu sa UEFA Sudijskom konvencijom;
- na osnovu postignutih rezultata ocjenjuje i rangira kategorije sudija, asistenata sudija i posmatrača suđenja;
- provodi program razvoja radi obuke i edukacije sudija, pomoćnika sudija, sudija futsala, instruktora sudija i posmatrača suđenja, kako bi se osigurala pravilna, unificirana i konzistentna primjena pravila igre;
- prepoznaje, prati i podržava perspektivne mlade sudije;
- predstavlja NS/FS BiH prema njegovim asocijacijama članicama u pitanjima vezanim za sudije i suđenje;
- razvija suđenje u asocijacijama članicama NS/FS BiH kroz implementaciju UEFA-e Konvencije o edukaciji i organizaciji sudija (u nastavku: UEFA-e Konvencija o sudijama), putem Panela za sprovođenje UEFA Sudijske konvencije;
- usvaja listu instruktora sudija i posmatrača suđenja;
- izrađuje i provodi svoj program razvoja u skladu s UEFA-e i FIFA-e instrukcijama;
- pomaže asocijacijama članicama NS/FS BiH u pitanjima vezanim za sudije i suđenje;
- donosi odluku o broju sudija, kao i listu sudija za sva takmičenja u nadležnosti NS/FS BiH;
- na osnovu propisanih kriterija dostavlja FIFA-i prijedloge sudija za FIFA međunarodnu listu sudija;
- imenuje instruktore za teoretski i praktični dio ispita za sticanje pojedinih kategorija zvanja sudija, u skladu sa Pravilnikom o sudijama i suđenju NS/FS BiH;
- određuje sudije za prijateljske međunarodne utakmice reprezentacija NS/FS BiH, u saradnji sa Odjelom za sudije GS NS/FS BiH;
- daje tumačenja Pravila igre i predlaže odluke u vezi s njima;
- podnosi izvještaje na kraju polusezone i sezone IO NS/FS BiH, u skladu sa odredbama UEFA Konvencije o sudijama;

- u saradnji sa Odjelom za sudije i sudijska pitanja NS/FS BiH sačinjava ispitne zadatke i formu polaganja ispita za stjecanje zvanja savezni sudija;
- ovaj komitet je nadležan i za sva ostala pitanja u skladu odlukama Izvršnog odbora NS/FS BiH, kao i odredbama Pravilnika o sudijama i suđenju NS/FS BiH, te UEFA Sudijske konvencije.

## **Član 23.**

### **6. KOMITET ZA OMLADINSKI NOGOMET/FUDBAL**

#### ***a) Uslovi za status člana***

Članovi i zamjenski članovi moraju imati visoku školsku spremu (četverogodišnji studij ili minimalno 240 ECTS bodova), uz stručno iskustvo od 3 (tri) godine nakon sticanja tražene stručne spreme i iskustvo od 3 (tri) godine u nogometu/fudbalu, kao istaknutog nogometnog/fudbalskog stručnjaka.

#### ***b) Nadležnosti i zadaci***

Komitet za omladinski nogomet / fudbal:

- u saradnji sa Tehničkim odjelom predlaže način organizovanja takmičenja u omladinskoj konkurenciji u BiH za duži vremenski period;
- u saradnji sa Tehničkim odjelom predlaže mjere za unapređenje razvoja omladinskog nogometa/fudbala;
- učestvuje u predlaganju stručnih štabova omladinskih reprezentativnih selekcija;
- predlaže izmjene i dopune propisa u vezi sa omladinskim nogometom/fudbalom;
- Komitet je nadležan i za druga pitanja prema odlukama Izvršnog odbora NS/FS BiH.

## **Član 24.**

### **7. KOMITET ZA ŽENSKI NOGOMET/FUDBAL**

#### ***a) Uslovi za status člana***

Članovi i zamjenski članovi moraju imati visoku školsku spremu (četverogodišnji studij ili minimalno 240 ECTS bodova), uz stručno iskustvo od 3 (tri) godine nakon sticanja tražene stručne spreme i iskustvo od 3 (tri) godine u nogometu/fudbalu, kao istaknutog nogometnog/fudbalskog stručnjaka.

#### ***b) Nadležnosti i zadaci***

Komitet za ženski nogomet / fudbal:

- u saradnji sa Tehničkim odjelom predlaže način organizovanja takmičenja u ženskoj konkurenciji u BiH za duži vremenski period;
- u saradnji sa Tehničkim odjelom predlaže mjere za unapređenje razvoja ženskog nogometa/fudbala;
- učestvuje u predlaganju stručnih štabova ženskih reprezentativnih selekcija;
- predlaže izmjene i dopune propisa u vezi sa ženskim nogometom/fudbalom;

- Komitet je nadležan i za druga pitanja prema odlukama Izvršnog odbora NS/FS BiH.

## Član 25.

### 8. KOMITET ZA FUTSAL I NOGOMET/FUDBAL NA PIJESKU

#### **a) Uslovi za status člana**

Članovi i zamjenski članovi moraju imati visoku školsku spremu (četverogodišnji studij ili minimalno 240 ECTS bodova), uz stručno iskustvo od 3 (tri) godine nakon sticanja tražene stručne spreme i iskustvo od 3 (tri) godine u nogometu/fudbalu, kao istaknutog nogometnog/fudbalskog stručnjaka.

#### **b) Nadležnosti i zadaci**

Komitet, putem Tehničkog odjela:

- u saradnji sa Tehničkim odjelom predlaže mjere za unapređenje razvoja futsala i nogometa/fudbala na pijesku;
- učestvuje u predlaganju stručnih štabova reprezentativnih selekcija u futsalu;
- predlaže izmjene i dopune propisa u vezi sa futsalom i nogometom/fudbalom na pijesku;
- ovaj komitet je nadležan i za sva ostala pitanja u skladu sa odlukama Izvršnog odbora NS/FS BiH.

## Član 26.

### 9. KOMITET ZA STATUS I TRANSFER IGRAČA

#### **a) Uslovi za status člana**

Članovi i zamjenski članovi moraju imati visoku školsku spremu, završen pravni fakultet (četverogodišnji studij ili minimalno 240 ECTS bodova), uz stručno iskustvo od 3 (tri) godine nakon sticanja tražene stručne spreme.

#### **b) Nadležnosti i zadaci**

Komitet za status i transfer igrača:

- prati osiguravanje uslova i ostalih neophodnih elemenata za radno, profesionalno, ekonomsko, socijalno, zdravstveno, edukaciono i tehničko stanje igrača prema potrebi, štiti njihov opšti status, legitimna prava i interese, osiguravajući najbolji način za moguće ostvarivanje igračevih interesa i prava kao i njihovih odgovornosti i obaveza, ali takođe štiti i legitimne interese i prava NS/FS BiH, kao i njegovim udruženim članovima uključujući i klubove;
- prati i primjenjuje najbolju praksu vođenja sigurnog i povoljnog statusa igrača, kontroliše transfer igrača iz kluba u klub, primjenjuje promotivne strategije i akcije kako bi se iste implementirale u NS/FS BiH i njegovim udruženim članovima, uz posebnu pažnju da one budu usklađene sa pravilnicima NS/FS BiH kao i odgovarajućim FIFA-e Pravilnikom za status i transfere igrača, kao i sa međunarodnim i domaćim propisima/zakonima koji se odnose na ljudska



prava, zakonima o radu, kao i pravima iz radnog odnosa, te svim ostalim opštim i posebnim međunarodnim i domaćim propisima relevantnim za status u različitim kategorijama rada i/ili zanimanja (profesionalno, radni odnos, dobrovoljno, i sl.), kao i sa modernim menadžerskim postupcima u ovoj oblasti kako bi se gore navedene aktivnosti omogućile na odgovarajući način.

- razmatra pitanja vezana za aktivnosti zastupnika igrača i u skladu s tim savjetuje IO NS/FS BiH;
- u drugom stepenu rješava sporove koji nastanu u primjeni ugovora igrač-klub;
- rješava prigovore na odluke prvostepenih organa o registraciji igrača za igrače koji se registruju za klubove Premijer lige BiH i sporove u vezi s registracijom igrača, ukoliko su u sporu klubovi iz različitih entiteta;
- priprema prijedloge izmjena i dopuna propisa koji se odnose na registraciju, status i transfer igrača;
- daje tumačenja vezana za primjenu Pravilnika o registraciji, statusu i transferu igrača NS/FS BiH;
- osigurava poštivanje Pravilnika o statusu i transferu igrača FIFA-e;
- rješava i druga pitanja unutar svoje nadležnosti, koje joj povjeri IO NS/FS BiH.
- ovaj komitet je nadležan i za sva ostala pitanja u skladu sa odlukama Izvršnog odbora Saveza.

## Član 27.

### 10. PRAVNI KOMITET

#### *a) Uslovi za status člana*

Članovi i zamjenski članovi moraju imati visoku školsku spremu, završen pravni fakultet (najmanje četverogodišnji studij, ili minimalno 240 ECTS bodova), uz stručno iskustvo od 5 (pet) godina nakon sticanja tražene stručne spreme.

#### *b) Nadležnosti i zadaci*

Pravni komitet:

- vrši praćenje odredbi svih zakona, podzakonskih akata i propisa i svih međunarodnih propisa relevantnih za NS/FS BiH, uključujući zakone i pravilnike UEFA-e i FIFA-e, kao i domaće pravne dokumente koje izdaju nadležna zakonodavna tijela, kao i zakone, podzakonske akte i pravilnike koje izradi bilo koje tijelo ili član NS/FS BiH, a u vezi sa nadležnostima NS/FS BiH, vrši ocjenu usklađenosti jednih s drugima, procjenjuje valjanost svih relevantnih pravilnika i propisa sa posebnim osvrtom na osiguravanje konačnih verzija svih navedenih dokumenata NS/FS BiH, prije nego što ih razmotri i usvoji IO NF/S BiH ili Generalna skupština NS/FS BiH;
- prati i provodi najbolju praksu u održavanju efektivnih pravnih struktura i funkcija drugih nogometnih/fudbalskih saveza, kao i praksu FIFA-e i UEFA-e kako bi se razvila i osigurala potpuna vladavina prava;
- prati i primjenjuje najbolju prakse i ponašanje svih odgovornih tijela i pojedinaca u smislu njihovih obaveza kako bi se poštovali navedeni zakoni, podzakonski akti, kao i propisi, čime bi se spriječila zloupotreba zakonskih obaveza propisanih tim dokumentima;

- daje mišljenje o predloženim kandidatima entitetskih saveza o ispunjavanju uvjeta/uslova za članstvo u komitetima/komisijama – povjerenistvima iz ovog pravilnika;
- vrši analizu pravnih pitanja vezanih za nogomet/fudbal i o tome savjetuje IO NS/FS BiH i Generalnog sekretara NS/FS BiH;
- daje pravne savjete vezano za statut i pravilnike NS/FS BiH, kao i statut i pravilnike asocijacija članica NS/FS BiH (NS FBiH i FS RS);
- raspravlja i proučava domaće zakone koju utiču na nogomet/fudbal i NS/FS BiH;
- daje pravne savjete o sporovima u koje je uključen NS/FS BiH;
- prati izradu zakona u BiH i EU u oblasti sporta uopšte, a naročito u oblasti nogometa/fudbala;
- ovaj komitet je nadležan i za sva ostala pitanja u skladu sa odlukama Izvršnog odbora NS/FS BiH.

## **Član 28.**

### **11. KOMITET ZA STADIONE I BEZBJEDNOST**

#### ***a) Uslovi za status člana***

Članovi i zamjenski članovi moraju imati visoku školsku spremu (četverogodišnji studij ili minimalno 240 ECTS bodova), uz radno iskustvo od najmanje 3 (tri) godine nakon sticanja tražene stručne spreme, u javnim službama sigurnosti ili zaštitarskim agencijama, ili da su u prethodnom periodu obavljali dužnost člana Komiteta za stadione i bezbjednost u trajanju od najmanje 4 (četiri) godine, te da imaju iskustvo u organizaciji sportskih javnih okupljanja. Obavezno je poznavanje engleskog jezika (nivo A2.2).

#### ***b) Nadležnosti i zadaci***

Komitet za stadione i bezbjednost:

- prati odredbe svih zakona, podzakonskih akata, propisa i svih međunarodnih propisa relevantnih za NS/FS BiH, uključujući zakone i pravilnike UEFA-e i FIFA-e kao i domaće pravne propise i standarde povezane sa izgradnjom i bezbjednosti stadiona kao i sprečavanjem incidenata i huliganstava na sportskim događajima;
- predlaže izmjene i dopune propisa iz oblasti bezbjednosti;
- registruje sve negativne pojave na nogometnim/fudbalskim stadionima i predlaže mjere kojima se sprečava širenje istih;
- na kraju svake takmičarske sezone, a po potrebi i češće podnosi izvještaj IO NS/FS BiH o bezbjedonosnom stanju na nogometnim/fudbalskim utakmicama;
- organizuje seminare za voditelje osiguranja klubova na temu bezbjednosti organizacije utakmica;
- podstiče saradnju klubova sa organizovanim klubovima navijača;
- predlaže, u saradnji sa takmičarskim odjelom, utakmice visokog rizika Premijer lige BiH i ostalih takmičenja u organizaciji NS/FS BiH, te na iste delegira članove Komiteta i članove GS koji su nadležni za ovu oblast, u svojstvu komesara za bezbjednost NS/FS BiH; delegiranje vrše predsjednik i dva potpredsjednika;

- predlaže planove obezbjeđenja utakmica svih reprezentativnih selekcija NS/FS BiH;
- predlaže IO NS/FS BiH Oficira za bezbjednost NS/FS BiH, u skladu sa propisima FIFA i UEFA;
- ovaj komitet je nadležan i za sva ostala pitanja u skladu sa odlukama Izvršnog odbora NS/FS BiH.

## **Član 29.**

### **12. KOMITET ZA MEDIJE**

#### ***a) Uslovi za status člana***

Članovi i zamjenski članovi moraju imati visoku školsku spremu (četverogodišnji studij ili minimalno 240 ECTS bodova), uz stručno iskustvo od 3 (tri) godine nakon sticanja tražene stručne spreme.

#### ***b) Nadležnosti i zadaci***

Komitet za medije:

- prati odredbe svih za NS/FS BiH relevantnih propisa, pravilnika i dokumenata koje izdaju nadležni organi, a odnose se na informisanje javnosti;
- prati i proučava razvoj odgovarajućih medijskih alata i tehnologija i izrađuje vlastite predloge pravila i propisa o prenošenju informacija i korištenju medija za nadležne organe NS/FS BiH i njegove asocijacije i klubove članove, u okviru nadležnosti NS/FS BiH, te ocjenjuje adekvatnost različitih medija za promovisanje nogometne/fudbalske igre i efikasno prenošenje relevantnih informacija o nogometu/fudbalu i za nogomet/fudbal;
- prati prakse i ponašanje svih odgovornih tijela i pojedinaca u okviru NS/FS BiH u smislu njihovih obaveza da poštuju moderne medijske standarde i propise radi sprječavanja eventualnih dezinformacija, o svim akterima nogometne/fudbalske igre i takmičenja;
- prati i medijsko izvještavanje o ponašanju, fer pleju, moralu i društvenoj odgovornosti svih aktera fudbalske igre i takmičenja;
- ovaj komitet je nadležan i za sva ostala pitanja u skladu sa odlukama Izvršnog odbora NS/FS BiH.

## **Član 30.**

### **13. KOMITET ZA MARKETING I TV**

#### ***a) Uslovi za status člana***

Članovi i zamjenski članovi moraju imati visoku školsku spremu, završen ekonomski fakultet (četverogodišnji studij ili minimalno 240 ECTS bodova), uz stručno iskustvo od 3 (tri) godine nakon sticanja tražene stručne spreme.

#### ***b) Nadležnosti i zadaci***

Komitet za marketing i TV:

- prati odredbe domaćih i svih za NS/FS BiH relevantnih međunarodnih propisa uključujući propise UEFA-e i FIFA-e kao i domaće pravilnike i dokumente koje izdaju nadležna zakonodavna tijela, povezane sa opštim aktivnostima marketinga i reklamiranja preko TV-a, a naročito one povezane uopšte sa sportom i posebno sa fudbalom;
- prati i proučava razvoj odgovarajućih nogometnih/fudbalskih marketinških alata i tehnologija kao i TV tehnologija i izrađuje vlastite prijedloge pravila i propisa o marketingu i korištenju TV-a za nadležne organe NS/FS BiH i njegove asocijacije i klubove članove, u okviru nadležnosti NS/FS BiH, te ocjenjuje adekvatnost različitih marketinških istraživanja za promovisanje nogometne/fudbalske igre korištenjem TV-a kao najpristupačnijeg i najprihvatljivijeg medija;
- prati i mjeri najbolje prakse održavanja razvoja dobrih marketinških praksi i upotrebe TV-a u korist nogometne/fudbalske igre;
- prati i proučava prakse i ponašanje svih odgovornih tijela i pojedinaca u okviru NS/FS BiH u smislu njihovih obaveza da istražuju tržište i reklamiraju nogometnu/fudbalsku igru;
- raspravlja o opštoj marketinškoj strategiji za sva takmičenja NS/FS BiH i o njihovoj vezi sa mrežom TV medija radi informisanja IO NS/FS BiH;
- savjetuje o pitanjima koja se tiču odnosa između NS/FS BiH i raznih marketinških i medijskih partnera, naročito TV-a;
- podstiče razmjenu informacija između nacionalnih asocijacija i/ili klubova o marketingu i TV-u;
- prati razvoj i evoluciju TV i marketinške industrije;
- daje prethodno mišljenje na prijedloge novih marketinških ugovora NS/FS BiH, prije konačne odluke IO NS/FS BiH;
- ovaj komitet je nadležan i za sva ostala pitanja u skladu sa odlukama Izvršnog odbora NS/FS BiH.

## **C – Ad hoc komiteti/komisije**

### **Član 31.**

IO NS/FS BiH može po potrebi imenovati ad hoc komitete/komisije radi rješavanja posebnih pitanja na ograničeni vremenski period. IO NS/FS BiH određuje sastav komiteta/komisija i definiše njihova prava i dužnosti.

IO NS/FS BiH imenuje predsjedavajućeg i 2 (dva) potpredsjedavajuća ad hoc komiteta.

Predsjedavajući ili jedan od 2 (dva) potpredsjedavajuća mora predstavljati FS RS.

## **IV PRAVNA TIJELA NS/FS BiH**

### **A - Vrste pravnih tijela**

#### **Član 32.**

Pravna tijela NS/FS BiH su:

- a) Disciplinska komisija,
- b) Apelaciona (žalbena) komisija,
- c) Tužioci,
- d) Prvostepena komisija za licenciranje,
- e) Apelaciona (drugostepena) komisija za licenciranje.

## **B - Zajedničke odredbe za pravna tijela**

### **Član 33.**

(Sastav pravnih tijela)

Pravna tijela, izuzev Tužioca, sastoje se od 6 (šest) redovnih članova, uključujući i jednog predsjedavajućeg, prvog potpredsjedavajućeg, drugog potpredsjedavajućeg i 3 (tri) zamjenska člana.

Članove pravnih tijela bira Generalna skupština NS/FS BiH na mandat od 4 (četiri) godine, uz rotaciju predsjedavajućeg, prvog potpredsjedavajućeg i drugog potpredsjedavajućeg svakih 16 (šesnaest) mjeseci.

Generalna skupština NS/FS BiH osigurava da 2/3 (dvije trećine) članova pravnog tijela budu predstavnici NS FBiH, a 1/3 (jedna trećina) predstavnici FS RS.

Predsjedavajući i prvi potpredsjedavajući pravnog tijela ne mogu biti iz istog entiteta (NS FBiH ili FS RS). Izbor drugog potpredsjedavajućeg je otvoren samo za člana pravnog tijela koji predstavlja NS FBiH.

Ako predsjedavajući prvostepenog pravnog tijela (npr. disciplinske ili komisije za licenciranje) bude izabran iz jednog entitetskog saveza (NS FBiH ili FS RS), onda se predsjedavajući drugostepenog tijela (npr. žalbene ili drugostepene komisije za licenciranje) mora automatski birati iz drugog entitetskog saveza (NS FBiH ili FS RS).

Članovi pravnih tijela ne mogu u isto vrijeme biti članovi niti jednog drugog tijela NS/FS BiH.

### **Član 34.**

(Imenovanje članova pravnih tijela)

Članove pravnih tijela Generalna skupština NS/FS BiH imenuje na prijedlog udruženih članova NS/FS BiH (NS FBiH i FS RS), putem IO NS/FS BiH.

Generalni sekretarijat NS/FS BiH određuje razuman rok za podnošenje prijedloga za imenovanje pravnih tijela.

### **Član 35.**

(Razrješenje članstva u pravnom tijelu)

Član pravnog tijela može biti razriješen funkcije (članstva) te po potrebi, zamijenjen putem Izvršnog odbora za preostali period mandata (članstva) u slučaju:

- a) smrti;
- b) ostavke;
- c) nesposobnosti obavljanja dužnosti zbog teške bolesti ili nesreće;
- d) razrješenja prema odredbama Statuta NS/FS BiH;

- e) ukoliko prema ocjeni IO NS/FS BiH svoju funkciju obavlja na nezadovoljavajući način;
- f) kada član ne prisustvuje na najmanje dvije propisno sazvane sjednice komiteta bez opravdanog razloga tokom iste kalendarske godine.
- g)

Ako jedno od pravnih tijela bude svedeno na 6 (šest) ili manje članova (uključujući i zamjenske), IO NS/FS BiH odmah saziva vanrednu Generalnu skupštinu NS/FS BiH za izbor novih članova/zamjenskih članova, kako bi se upotpunilo određeno pravno tijelo za ostatak mandata.

### **Član 36.**

(Kvorum i odluke)

Predsjedavajući svakog pravnog tijela saziva sjednice i upućuje poziv sa dnevnim redom, dvojici potpredsjedavajućih i trojici redovnih članova. Svaki član se može zamijeniti zamjenskim članom kada takav član ne može prisustvovati iz opravdanih razloga (nesreća, bolest, odmor, itd.)

Kvorum prisustva za pravna tijela je najmanje 5 (pet) od pozvanih članova za tekuće predmete. Ako se ne postigne kvorum prisustva, u roku od narednih 7 (sedam) dana se saziva drugi sastanak, gdje najmanje 3 (tri) od pozvanih članova moraju biti prisutni. Odluke se donose, na prvom sastanku, ako ih podrži najmanje pola prisutnih članova, a na drugom sastanku ako ih podrži više od pola prisutnih članova.

U slučaju neriješenog glasanja, odlučujući glas je glas predsjedavajućeg. Glasanje se obavlja dizanjem ruku.

Pravna tijela mogu donositi odluke i pisanim očitovanjem članova komiteta (putem faxes ili e-maila) ako se ne radi o hitnim pitanjima i odlukama od posebnog i odlučnog značaja za NS/FS BiH.

### **Član 37.**

(Primjena odredbi o radu komiteta na pravna tijela)

Odredbe o radu komiteta koje se odnose na načela u radu (član 7.), predsjedavajućeg (član 8.), sekretara (član 9.), saradnju, podršku i radne grupe (član 10.), prisustvo i učestalost sastancima (član 11.), dnevni red sastanka (član 12.), zapisnik-listu aktivnosti (član 14.), etičko i profesionalno ponašanje i ostale obaveze (član 15.) i dnevnice, troškove i druga prava (član 16.), primjenjuju se i na pravna tijela, osim na tužioce.

### **Član 38.**

(Primjena odgovarajućih pravilnika)

Detaljni propisi, procedure i način rada Disciplinske i Apelacione komisije propisani su Statutom NS/FS BiH i Disciplinskim pravilnikom NS/FS BiH, a propisi, procedure i način rada Prvostepene i Apelacione (drugostepene) komisije za licenciranje propisani su Pravilnikom za licenciranje klubova NS/FS BiH.

Nadležnosti, prava i dužnosti tužilaca definirana su odgovarajućim odredbama Statuta NS/FS BiH, kao i posebnim propisima.

## **C – Uslovi za status člana pravnih tijela**

### **Član 39.**

Članovi i zamjenski članovi moraju imati visoku školsku spremu, završen pravni fakultet (najmanje četverogodišnji studij, ili minimalno 240 ECTS bodova), uz stručno iskustvo od 5 (pet) godina nakon sticanja tražene stručne spreme.

Članovi Prvostepene i Drugostepene komisije o licenciranju moraju ispunjavati uslove o stručnoj spremi u skladu sa Pravilnikom o licenciranju NS/FS BiH.

## **V ZAVRŠNE ODREDBE**

### **Član 40.**

(Usaglašavanje pravilnika)

Nadležni entitetski savezi (NS FBiH i FSRS) dužni su do 01.10.2019. godine donijeti svoje odgovarajuće pravilnike u skladu sa ovim pravilnikom.

Ukoliko nadležni entitetski savezi ne donesu svoje pravilnike u roku iz stava 1. ovoga člana, na iste će se primjenjivati odredbe ovog Pravilnika o radu komiteta IO i pravnih tijela NS/FS BiH.

Odredba iz stava 2. ovoga člana će se primjenjivati do konačnog donošenja usaglašenih odgovarajućih pravilnika nadležnih entitetskih saveza (NS FBiH i FSRS).

### **Član 41.**

(Stupanje na snagu)

Ovaj Pravilnik stupa na snagu danom objave u Službenom glasniku NS/FS BiH.

**PREDSJEDNIK**

**Elvedin Begić, s.r.**